

岱屏公暨配黃太宜人傳

誥贈奉政大夫岱屏公諱芳音天性純篤幼侍先奉
政公出就外塾卽終歲定省無少懈太宜人病劇侍
湯藥輒廢眠食及棄養哀毀盡禮先奉政公誓不續
則敬謹隨侍依依膝前不敢以名利奔走離左右以
終父養志向最超卓時有慷慨激昂之概咸豐壬子
粵逆至公以義憤挺身出辦理團練出貲募垞勇梭
巡街城凡八十晝夜圍解文正公曾以在事有功保
給軍功七品彙案咨部而公尤奮志科甲束髮受書
時卽淹貫經籍皆有所摘錄以成一家言特阨於童

子試以例國子生習舉子業屢蹶名場不介意咸豐
庚申歲試始入泮時年已四十有三白是猶七試棘
闈至老不倦歷歲授徒善說經史故從事多發越課
子若壻出一手迄於有成陶子煜南以癸酉同領鄉
薦傳爲盛事公壻亦公門下也總纂辛酉族譜宗祠
事無大小均極力摒擋垂二十年百廢具舉皆恪承
先奉政公志其董黌宮事一以維持名教爲己任迄
今鄉族咸嘖嘖稱道焉配黃氏誥贈太宜人性格幽
閒寡言笑平時洗手作羹聞雞戒旦鍼刺紡績雖日
疾頻仍初不之廢至其逮下以恩鞠育子若孫痾痛

相關教養盡道殆有視陶孟諸賢爲不稍遜云